



KALAAM MEDIA NUAI AH WEBSITE TRAINING (JULY 1-10, 2024)



To,

If undelivered please return to - TPC Office,
P.O. Box - 107
D. Phailian,
Churachandpur - 795128
Manipur, India



PRESBYTERIAN KOCHUAM

- In God We Trust
- Khanglaite leh midangte panpi
- Thilpha hi ding ah siam
- Church leh Para-Church kiguizawpna

Editor : Rev. S. Lama Vaiphei, Executive Secretary

Joint Editors : Rev. P.B Zosapthara, Consultant
 : Rev. K. Jama Vaiphei
 : Rev. Th. Samuel Vaiphei
 : Upa Lalminsang
 : Upa S. Lalpi
 : Pi Hawipakkim, Secretary, CKNP
 : Tv. Lianmuanthang, Secretary, CKKP

Business Manager : Pu Langlalthamuan
 TPC Office D. Phailian
 P.O. Box 107 CCPur-795128 Manipur
 Phone No. +91 9958160325
 Email - ehinnavak@gmail.com

Kum khat lak man : Rs. 150.00

A man pia nuam leh a la thak nuam ten Business Manager kianga hiatsak ding.

A SUNGAH THU UMTE

1. EDITORIAL	01
2. KOCHUAM HUANG	02
3. PRESBYTERIAN KOCHUAM	03
4. IN GOD WE TRUST	12
5. KHANGLAITE LEH MIDANGTE PANPI	16
6. THILPHA HI DING AH SIAM	20
7. CHURCH LEH PARA-CHURCH KIGUIZAWPNA	23
8. SERMON	
a) Ahi'nla, Thoimualte chu lakdaw ahi puai	30
9. LÂ LEH A CHANCHIN	34
10. KKP HUANG	40
11. SUNNA	43

SYNOD PUIPATE

Moderator : Rev. Kamkhotinthang Neihsial
 Secretaries : Rev. Thanglianlal (Sr.)
 Rev. Andrew LR Khiangte (Jr.)
 Finance Officer : Rev. S. Khaikhawlam
 Statistician : Upa S. Thongzalal
 Executive Secretary : Rev. S. Lama Vaiphei
 Consultant : Rev. P.B. Zosapthara

Hinna Vâk ah thu kisua zosia hi Editor ngaidan a hi suak puai



Pauchapna Thupi:

1. Gam leh Nam leh khawtâng ah Puitute a ding in pauchap hitiu.
2. I Kochuam apat Pathian na sem leh Pathian thu zil ding ah kuandawk zosiate pauchappi hitiu.
3. Sunday School ah Pathian thu zilna hi Zilfîltu leh Zillaite'n i lawkpi zel theina dingun pauchap hitiu.
4. Gamsung buaina ziaak ah panlatu pawl chuam chuam ah puitute â ding in pauchap hitiu.

LALPA THAGAU UMNA ZALEN GAM

Zalenna kiti hin i gam kivaiahawmna democracy political system hi a kaw k hawi ma mai. Zia tak a chun-Zalenna, mizosia Dan nuai ah kibang i hinaw leh diktak ah vaihawmnate a kaw k bîk hi. Zia gual zalenna dawium tak chu thîl kawm in separate administration i dawn ui. I duthusam teu hi lawting leu hen thil kipakum tak chu hi ding a hia, maleh bang i chan ding uh vang genlawk thei a hi puai.

Ei uh Pathian chate hi chu i Bible hin bailam tak ah zalenna i nei thei ding dan uh ei la hil a um ah, zia chu: *“Lalpa chu Thagau a hia, Lalpa Thagau umna taphot a chun zalenna a um sek hi”* (2 Korinth 3:7) a tii. Zalen gam ah um ngal ah zalen theilo hi bang zia k a diam? I zalen theina ding ua bang pawimaw a diam? A bailam pen ah gen ding a chun Thagau pui ah i um uh ngai ding dan a hi. I lak ua Lalpa a panlo zia k hilo in ama i kipuisaklo zia k zawk uh hi in ka hiai.

I kiang kimvel ah umte tawh i kâl ua hin zalenna a um theina ding in- Lalpa Thagau puina bep in pau in, zia k in, sem in bawl leu hen i kâl ua hin zalenna chu um ngei in tin, i khawsakna gam uh hi Zalen Gam chu himai ding a hi.

I nawp nawp gen i nawp nawp zik, i nawp nawp bawl hi zalenna a hia pua, Lalpa Thagau puihuaina ah bangkim i bawl ah i gen tak ualeh zalenna chu hung hi bep ding a hi. Zalen gam ah chen la nuam em? -Zia gam a hin um inla bittak in um in. Zalen hi la nuam em? -Lalpa Thagau kipuisak in la, Thagau in gen ding ah a hilte bep gen inla, zik ding ah a hilte bep zik inla, bawl ding ah a hilte bep bawl inla, ne leh dawn ding ah a hilte bep ne leh dawn in um le chun mi zalen himai ding la hi. Israelte sun ah sùmding leh zan ah mei ah puitu khale Lalpa Thagau tho a hia, Meitei gal ei zaw piak theitu le a ma baw k hi a hi vei. Biak-In sung bep hilo in frontline tiang ah ei puitu ding Lalpa Thagau i mamaw ui.



Kochuam Huang

Health Sunday

Kochuam Nibîk Ni Health Sunday chu July 7, 2024 ni'n Kochuamte'n mani lemchan dan chiat in lawting tak in mat a hi.

Kochuam vethakna

Rev. P.B. Zosaphara, Consultant leh Rev. S. Lama Vaiphei, Executive Secretary te chun July 8-11, 2024 sung in M. Vawkbawl Kochuam, V. Munlai Kochuam leh New Dampi Kochuamte vethakna a neu'i.

Khamthei bawl a kiam theina ding ah Awareness Campaign

Synod 2:8; SEC 10:15; OM 29:8 chun i gamsung ah Khamthei bawl a kiam theina ding ah Awareness Campaign nei ding pha a lah sa, Bial tinte Short Video Clip siam kigualsiakna le a guanggal hi. Video sau dan hi 5-7 minute kikal hi'ntin, October 31,

2024 masang ah Executive Secretary kiang ah piaklut ding hi'na. Kigualsiakna Result puandawna hi November 7, 2024 ni i Synod Office mun ah nei ding a hi.

Relief kipia

Jiribam buaina ziak ah i kochuam mi haksatna tuakte panpina ding in Anchang Half Bag 1 chiat piak a hui. (OM 29:11)

Website Training

July 1-10, 2024 sung in Kalaam Media guanggalna in Guwahati ah Website Training a lah nei ua, zia hun ahin i Synod min in T. Upa Songliansang leh T. Upa Langlalthamuan te a va pang thei ui.

Finance Campaign

Finance Committee 5:3(2) dungzui in Finance Campaign hi Bial Standing leh Resource Person-te kihetua ah Programme siam in August 18, 2024 ah mat hi ding a hi. Programme lawting tak ah mat a hi theina ding in Kochuam ten Pauchap na'n delzui hitiu.

“PRESBYTERIAN KOCHUAM”

~ Tv. P. James
B.A., B.D

Amasan, i chiapi zinglai “Presbyterian Kochuam” ti thupi zik ding a dawisakna kachan zia in kipakthu kagen a hi.

Thumapui: Tulai ahin Kochuam tamtak a hung kibelap zel ah, a phapen ding hawl ah saikâl vel vel i hichun i ginna ki-etchian ngai mama ding a hi. I umna Kochuam lul zia i hetchianlo ahichun ginna vênbit zia umlo a hi. I hetchianlo zia ah Kochuam dang ah kichawn a bailam ah, sawisel leh gensiat mai le awlsam ding a hi. Thil him him a bul ah kipat i hiat chun a kihechian diak sek a hi.

Presbyterian Kochuam leh a bâkkai kizawmkhawmte hi khawvel ah member hau lam ah a pathumna (third) ahia, Roman Catholic Kochuam leh Eastern Orthodox Kochuam ban chet a hi. Khawvel gam chuam ah kizawppi nei, Bible zilsakna tawh kituak, mipi zosia Huapzo Kochuam ah i pankhak uhi kipak um tak a hi. A huaplían mama ah, ziklang suaklo ding i hiziak in, pawimaw i sak diakte tamlo sulang ding ihiu. Presbyterian umzia, a hung piandaw dan,

a chiadan tângpi, i thugin piandawndan leh Kochuam dang tawh a kibatlona (*Baptisma chungchang*) te hi a la ngaitua khawm hitiu.

1. Presebyterian umzia:

“Presbyterian” ti hi Greek thumal “Presbyteros” ah kipat kiladawk ahia, a umzia chu “Upa” tina a hi. Greek-te chun kum upate genna’n a mangsek ui. Kochuam masate chun puitute genna’n a mang ua, zia chun Kochuam upate bep hilo in, Pastor, Upa,

Nasemtu (Deacon) te a huap a hi. Lal Jesu hunlai ah Judate'n Sunagog ah a hotute'u kona'n "*Presbuteros*" ti hi a la mang ui.

Presbyterian Kochuam ti umzia chu "*Upate vaihawmna kochuam*" ti ah gen a hi. I matdan tak ua chun Kochuam mipite thasang ah kitêldawk palaite leh Upate, Pastor-te vaihawmna a hi. Apostolte khan Kochuam phudawna zosia ah Upa a siampiak zel sek ui ti i Bible ah i mu'u a hi. (*Nasepte 15, 16, 20, 1 Peter 5*).

2. Presbyterian Kochuam piandawdan:

Thuthung Thak ah Kochuam hung ding ta chu mun chuam chuam in a hung kithezak zel ah. Kochuam min chuam bîk a nei pua, *Catholic (Universal)* ti in ziaktu khenkhat in a la zik sek ui. Kochuam suksiat gua'n Rome sawlkar inle a la do maleh, a suse theipua'i. Zilsakna diklote a hung pawtdawk sek ah, zia tiang ah chunle kipumkhat tak in Kochuam chu a chiazal a hi.

Kum CE 1054 a chun Thagau Thiangtho chungchang ah gindan kibatlona zia in Kochuam chu a hung kikhen ta a hi. Rome lalgam khawsak lam ah um Kochuamte chu *Eastern Orthodox Church* a kitiu ah, Greek pau a mang ua, khawthang lam ah um Kochuamte chu *Roman Catholic* a kitiu ah, *Latin pau* a mang ui.

Khawthang Kochuam chu lopi tak himaleh, Kochuam puitute chun CE 1500 vel ah khan gensiat a law ta khawpmai ui. Mipite lungthim ah Kochuam siamphat nawpna a lian ma ma ta. Kum CE 1517 in **Martin Luther** chun a hunlai ah Kochuam chiadan diklona thu Sawmkua leh Nga hial (**95 Theses**) ziakdawk in Wittenberg Kochuam Biak-In bâng in a takdawk ah, zia kipat chun Khawthang Kochuam chu a hung kiphelsua ta, Roman Catholic leh Protestant Kochuam a hung kikhen ta a hi. Protestant Kochuam sung ahin '*Lutheran Kochuam*' kiti pawl tawh '*Siamphat*

HINNA VÂK

Kochuam' (Reformed church)
kiti pawl a um ah, Siamphat
Kochuam lam ah puitu langsâl
tak chu John Calvin a hi.
French mi ahia, pan nasatak a
lak zia in a gam un a umphal
tapuau ah, Switzerland gam
ah Geneva khawpi ah tailut in,
zia chun Pathian na a sem a hi.

Siamphat Kochuam chun
Bible a kawi pawimaw ma ma
ah. Kochuam kikaihuaina ding
inle Thuthung Thak Kochuam
chiadan chu a entawn a hi.
Kochuam hotu thunei tak,
Pope a nei puau ah, Kochuam
puitu umtho maleh, mipi zosia
thasang ah vaihawmtu hileh ti
a dawidan uh a hi. Calvin in a
zik lekhabu "*Khristian Sakhua
Kikaihuaina*" (*Institutes of
the Christian Religion*) ah
chun Bible zilsakna mang
ah a guanggal, Kochuam
kivaipuakna ding dan a
zik, Thuthung Thak hun ah
Kochuamte ki-etkawl dan gual
ah hotu khat thunei chuam
umlo in, hotute kisuangsawn
dan a siamfel a hi. Zia chu
Presbyterian Kochuam
dindawna ding ah suangphûm

pawimaw tak a hung hita a hi.

Kum 1560 in Calvin siamdaw
Kochuam chiadan thak chu
John Knox (*Scotland gam
mi*) in a enfel ah, Scotland
vaihawmna sang pen inle a
pawmpi a hi. Zia hunlai ah
chun "*Siamphat Kochuam*"
(Reformed Church) ti ah hiat
minthang a la hiphawt ui. Kum
zabi 17-na kipat til lam a chun
Scotland gam ah Siamphat
Kochuam chun "*Presbyterian
Kochuam*" ti min a hung
mang pan tau. A bulpantute
hi mithiam tak tak ahiu ah, a
thiamnau ban ah Kochuam
Kikhawppi'n a namdet zel a
hiziak in chiadan fel tak leh det
tak nei in a hung piangdawk ta
a hi.

India gam inle Sap
missionary-ten a hung
phudawk uh a hi. Kochuam
kipumkhatna ngai pawimaw
tak a hiziak in pawl dangte
tawh a hung kizawpmat zel a,
Presbyterian ti min le a pu zui
chiat tapuau. Ziagual dinmun
a chun India malsak ahinle ei
Tangphai Provisional Synod,
Mizoram Synod, Manipur

Synod, KJP Synod leh a dang dangte huap in Presbyterian Kochuamte chu bangkim ah pangkhawm in hat tak in i chia zel uh a hi.

3. Presbyterian Kochuam chiadan:

Presbyterian Kochuam in chiadan det tak a nei ah, khawvel gam chuam chuam ah um a hiziak in kikaihuai dan leh chiadan a kip a kawi in a kibang suak tapuai. A gam mite khawsakdan tawh kituak ah siamlem a tam a hi. Kochuam siamphatute khan Bible ah Kochuam latdan gun tak ah zil in, Kochuam chiadan a la siamdawk ui. Zia chu mang ah i chia zia un Presbyterian Kochuam chiadan chu Bible zilsakna ah kinga ngei ahi ti thei a hi. Calvin in Bible pansan in Kochuam puitu ding chi li (4) a la tiangdawk ah - *Pastor, Zilsaktu, Upa leh Nasemtu (Deacon)* te ahiu. Ziagual hin Geneva khawpi ah Kochuam le a la chiapi a hi.

Calvin in Bible thuneina a kawi sang khawpmai ah, ginna leh thilhi tena diklo

theilo in a pawm a hi. I Thugin ngeiu le Bible pansan ah siam ahia, Bible ah panglo chu i tuipi ngailo a hi. Pathian thu a pawm dan ah "*Pathian Lal penna*" a kawi pawimaw bawk a hi. Lal Jesu hukdamna chu hepina zia k liau liau ah chan ahi zia a gen uang ah. I Kochuam kivaipuakdan a chun Kochuam masate chiadan gual in hotu lian chuam bîk umlo in, mipite thasang ah Upate vaihawmna chu hawi pen in ahia. Kochuam chu mipi vantâng vaihawmna gual ah chiapi chu Bible zilsakna tawh kituak pen in ahia a hi.

Kochuam committee in vaihawmna feltak a nei ah, a thuneina khêl ahi chun Bial ah a tut ah; Bial inle a thuneina khêl chu Presbytery ah a tut ah; Presbytery inle a thuneina khêl chu Synod ah a tut sek a hi. Chun, Kikhawmpi vaihawmna gual zel in Kochuam a chia zel a hi. Kikhawmpi pawimaw diakte chu - **Pastor Bial Kikhawmpi, Presbytery Kikhawmpi, Synod Kikhawmpi** te hi ahia,

HINNA VÂK

Synod chung ahin **Regional Assembly leh General Assembly** tite a um ah ziachu India Gam Presbyterian Kochuam (PCI) dangte tawh sepkhawmna a hi.

Presbyterian Kochuam chu Kikhawmpi thu in a chia ah, Kikhawmpi chu Lal Jesu Khrista thu gual in a chia hi ti i pawmchak ziak un, i za thiam takzet uh a hi. A neupen apat a lianpen tiang ah kikkaikhawmna, bangkim kihiatpi ah, a tampen dawi dan gual ah chiadan chu a hung siamdaw ah, zia chu mang in ki-pumkhat tak ah semkhawm in i chiato zel uh a hi. Ziagual baw a chun Kochuam pawl dangte tawh sepkhawm leh ki-chanauna phatak siam hi i Kochuam in a ngai pawimaw a hi. I Kochuam chiadan hi Bible ah kinga ahi ziak in chiadan phatak ahia, a det ah, Pathian inle mal a sawm baw a hi.

4. Presbyterian Kochuam Thugin piandaw dan:

Presbyterian Kochuam in Thugin pasawm (10) a nei ah, a hung kipatdan chawmkim in

sulang hitiu. Apostolte hunlai a khan Thugin chu a la um ah, zikdaw vang a la hipuai. Oral tradition (*kam ah gensawn/hilsawn*) ahiziak in, Pathian thute, Jesu Khrista chanchin leh a zilsaknate chu Kochuam masaten a la zawm dial dial ui. Apostolte hun hung kichai in (*a thi zaw nung un*), gindan diklote a pung nasa mama ah. Kochuam masa puitute chun gingtute puihuai zingthei ding in Thugin chu a hung zikdaw ta'u a hi.

Kochuam masalamchanchin ah Thugin kimute lak ah CE 120-250 kikal ah zik ding ah ginchak, **Apostolte Thugin** leh CE 325 ah Nicea Kikhawppi in a pawm, **Nicea Thugin** te hi a pawimaw in a langsâl diak a hi. Kochuam siamphatna chiazal in a hindaw **Westminster Thugin Puandawte** leh **Wales Gam Presbyterian Kochuam Thugin** hi India Gam Presbyterian Kochuam chun Pathian Thu hilchianna phatawk leh kingakna ding ah pawmdet in, Thugin 10 te chu a hung siamdaw a hi.

Kochuam masa ah kipat in Thugin siamdawna ding ah kingakna pen chu ***“Jesu Khrista chu Lal a hi”*** ti hi a hi. Jesu Khrista lalna leh thuneina hi Kochuam Thugin kingakna pen a hi. I Bible um maleh, zilsakna diklo pawmtute’n lam diklo lam in a hil theisek ua, ziaziak ahin i ginna venbit nading in Thugin nei hi a pawimaw a hi. Bible zilsakna tawh kituak ah zik a hiziak in, Presbyterian Kochuam Thugin hi a muan um ah, ngai pawimaw ah hetchian ding him a hi.

5. Kochuam dang tawh i kibatlona (*Baptisma chungchang*): Presbyterian Kochuam hin Kochuam dangte tawh kibatlona tamtak i nei ah, ziate chu Lalpa Kochuam lulna, thuneina leh lopina puanlatna a la hizek a hi.

Presbyterian Kochuam in Sakramen pani a nei ah, **Baptisma Sakramen leh Lalpa Zan An Sakramen** te hi a hi. Baptisma Sakramen chan chungchang ahin mi tamtak in dawtna i la bawl sek ah.

Baptisma hi Greek pau ahia, umzia chuam chuam a nei ah, ***tui ah buak, phum, dia, nu thaw, the, sil*** tite a kawka hi. Kochuam tamtak in Baptisma umzia hi i hiatdan uleh i hilchian dan a kibangpua, ziaziak ahin thu kichu le a um sek a hi. Midangte bawldan sawisel nading hizawlo in, a hina tak hetchian hi a dawki um khawpmai a hi.

Presbyterian Kochuam in Nausen baptisma i chansak ziaak tângpi :-

1. Nausen baptisma hi Jesu’n naupangte chung ah lungthim a put dan tawh a kituak ahi. (*Mar. 10:14*).
2. Juda naupangte chu ni giat ni zektan in Pathian sungkuan in a lalut sek ui. Jesu le a pian ah kipat a ni giat ni ah zek tan ahi thu i mu’u. Kochuam ah zia kibatpi chu nausen baptisma hi a hi.
3. Sungkuan baptisma changte i mu (*Nas 16:15,33;1Kor 1:16*). Zia hin gingtu sungkuan

HINNA VÂK

zosia, naupangte huap in baptisma chansak ahizia ei kawkmua a hi.

4. Thuthung Thak ahin Khristian Kochuam ah hung seiliente'n a piting nung ua baptisma a chang thu'u a kimu ngaipuai. Zia hin a naupan lai ua a chang suak tau ti a kawk thei bawk a hi.

5. Baptisma hin Pathian sungkuan ah naupangte chu lawplut in a pansak a, nu leh pate puihuaina nuai ah khanglian ding ahiu a, Pathian sungkuan ngei ah chun a khanlet uh a kûl a hi.

6. Naupang hi *Lungsiat thuthung* ah, thuthiam golutute ahiu ah. Lal Jesu ngei in, *"Naupangte kha ka kiang ah hungsak un la, zadâ kiu in; Pathian gam chu ziagual mite a ding chu ahi ngal ah,"* ati (Mar 10:14). Ziaziakchun, naupangte hi baptisma mang in lungsiatna thuthung ah leh Pathian sungkuan ah i lawplut uh a hi.

Nausen baptisma thuthung ahin i Kochuam Presbyterian thugin pawimaw tak a um ah, zia chu Pastor in nausen nu leh pate kianga dawtna leh dawnhuna (*kitiamna*) a bawlsek uh kha a hi. Naupang chu Sunday School (*nauhual programme mang le a ki um a hi*) mang in kochuam in pan a lakpi kit ah, kum 14 a hung tin hun in Kochuam member piting hiding ah dan sung ah lawplut a hisek ui.

Kochuam pawl khenkhat a chun pitingte bep baptisma chansak ding ahi ti in, kum (*15 yrs above*) bithiak nei in a la chansak sek ui. Khawvel ah Kochuam lian leh chiadan kibang zosiate hin nausente le baptisma chansak ding in ahiau ah, i Kochuam inle gingtute leh a chate'u chu baptisma i chansak sek uh a hi. Tuhin i Presbyterian Kochuam ahin a tamzaw hi nausen lai ah baptisma chang hung hiding i hui.

Baptisma chansak dan ah hinle bawl dan a kibang pua, Kochuam khenkhat chun tui

ah sitphûm khel khel chu hi dan umsun gual in a ngai ua; Presbyterian Kochuam in luchang ah thumvei tui buak in i chang ua, sitphum ah changte chu i pampai diaklo a hi. Kochuam khenkhat in amau hidan gual a hilote chu hukdam hilo ding hial ah a ngaitua gual uhi ei Presbyterian Kochuam in i bawl ngailo a hi.

Baptisma chan hi hukdam ah i umna ding ahipua, Jesu Khrista zal ah hukdam ah umte Pathian mi a hinau teptena leh namdetna a hizawi. I Kochuam in Baptisma a hilchian leh a pawm dan hi a kichian zawk sem dawina'n phatchuamngai tak in piting leh naupang lam zillai bu ah tenle chian tak in a la chuansak sek a hi.

Thukhakna: Presbyterian Kochuam chiadan tangpi sulang i hiziak in, zia khêl lam ahin bâk chuam chuam a kinei nalai ah. Kipuihuaidan leh gindan (*doctrine*) chungchang inle Kochuam dangte tawh kibatna leh kibatlona tamtak a um a hi.

Ei Tangphai Provisional Synod sung ziang ahinle thil umdan zilding leh hetding tamtak a um ah. Tualsung, Bial, Presbytery, Synod leh PCI tiang ah, Synod office department lam, Pathian Thu zilna lam, Sunday School Piting leh Naupang lam, Khanglai lam, Numei lam ahia, chun kivaihawmna lam ah Danbu le i nei ah, thugin ahia chuleh committee zat chuam chuam ki-etkawldante, Kikhawmpi matdan, kipuihuaina lam ah ziklodan i tite leh Pathian Biakna kikhawp puihuai dan chungchang ah hetding i zuizing lai le thil tamtak a um nalai a hi.

Chanchinpha puanzakna nasep leh Kochuam dang tawh sephawmna lam inle masawanna tamtak muding a um a hi. I kochuam chiadan chianzaw sem ah het nading ahin mawpuakna chanziak bep hilo in, Kochuam ah kibual tam a ngai ah, programme leh Biakna kikhawp, Bible sim leh pauchapna khêl lam ah Kochuam Thuginte hetchian

HINNA VÂK

a ngai ah, tu khang tawh kituak ah social media mat phatchuam dan leh Kochuam lekhabute le sim tam a kûl in a pawimaw a hi.

Kochuam tamtak kivaipuakdan chuam leh gindan kibanglo lak ah khawsa gingtute i hiziak in, mimal hinkhua leh ginna subuai thei thil tamtak a umthei a hi. Mani Kochuam hetchianna hin midang tele a puihuai thei ah, ki-unauna phatak a siamthei a hi. Tulai khawvel ahin mite'n Kochuam hi pawlam ah kipat thîl in têna zat chuam chuam in a tê sek ua, ziate hi Kochuam chiadan leh kivaihawmdan, ki-kaihuaidante hetchian tawklo ziaak a hideu sek a hi. Ziate ziaak ahin, mi khenkhat ten Kochuam zalona leh khawksaklona a nei khawlaw sek ua, zia hi thil khawtak a hi.

Presbyterian Kochuam chun Jesu Khrista hi Kochuam neitu leh hotu luchang pen ahi tihi det tak in a pawm ah.

Kochuam hi Lal Jesu ah kinga, Ama a ahiziak in, a nuam tapote a ding ah kihawng a hi. Ziachu a hizinglai in ginumtak ah Kochuam mi hi ding hi i mawpuakna a hi. ***Kochuam a ding ah mi ginum chu Lal Jesu a ding ah ginum a hi.*** Kochuam za umna kilatna leh sulangtu chu a Kochuam mite ma kihisek a hi.

Mun khenkhat ah chun, Presbyterian Kochuam chu midang lak inle a hetkhen thei ahi ti in gen a la hisek ah, Pathian biakna lam, kivaihawmna lam, sum leh pai etkawlna lam, Kochuam dang tawh sepkhawmna lam, thiangthona lam, hun matdik leh Pathian chawihawina lam ah tehin masawanna tamtak mudinga umsek a hi. Kochuam thianthona hi vawpbit zing a kûl in a pawimaw ah. Ginna vêngbit tu, Kochuam a ding ah mi phachuam leh mi mattâk, midangte a ding ah malsawmna hithei zel ding in Lalpa'n ei umpi chiat taken.

“IN GOD WE TRUST”

~ Tv. Khamjameson Suantak
B.A., B.D

Khawvel ah gam hausa leh changkâng ma ma U.S.A. (*United States of America*) te kingakna thupi pên chu **“IN GOD WE TRUST”** a hi. Ei pau a chun “Pathian ka ging ui” ti thei mai ina. Ahinla “ging” thumal sâng ahin “suang” thumal hi kamang nuam zaw (a umzia chu thakhat tho a hi). **“PATHIAN KA SUANG U’I”** ti hin a bân ah i gên ding tele kêwk-zang zaw ding in a kilang hi.

Naupang ziang inle America te hât dân ahiau a, “Kei USA lam ah pang” tî’n a lawi-leh-pai teu lak in a kisuang ma ma sek ui. Khawvel pumpi’n a zâ ma ma leh a lau ma ma’u chu USA te hi ahiu. Hât le a hât ua, a changkâng ua, a khangto bawk ui. Middle East lak ah gam umte - Iran, Iraq, Syria, Palestine leh a dang dangte’n le a do thuk ngamlo uh a hi. Sepai, gâlvân leh gâldona (Military) lam ah khawvel ah No. 1 (pakhatna) ahia; Internet (Google) in “Khawvel ah gam hât pen kua a h’em?” tî’n hawl (search) le hin a pakhatna

chu USA ahi zing ziang hi. Zia gual ma bawk chun, economy lam inle pakhatna ahi kit ui. Gam changkang ahi zia un, a khawsak danu khawvel in a entawn nasa ma ma a, ei uh gam lam tiang inle i ettawn uh a hitai. Sepna leh khawsak theina di bailam tak ah mutheina, lemchânna gam ahi zia in “*Land of opportunities*” le a kiti sek a, gam chuam chuam ah kipat mi tamtak in a zuan sek ua, khua-leh-tui hina (citizenship) a nei den hial sek uh a hi. Gam hing zing, gam bêltâk leh kingakna tâk, gam hât leh mi tamtak muang tak

HINNA VÂK

ah chên theina gam chu U.S.A. a hi. Gênbe ding tampi um thei nalai intin, a phatlona lam le gen ding tampi a um hi. Ahinla, i hiatsa'u a hia, aban ah thu pawimaw te hi ngaitua zui zaw hitiu;

United States gam ah kipat i tâklat nawp pen chu zia hi a hi - **Bang zia ah zia gual dinmun ahi ding thei ahi diam uh? Bang in a dawpkâng ahi diam?** A dawnhuna chu kingaitua sau le a ngaipuai. Pathian a ging ua, Pathian kingakna'n a nei ua, **Pathian a suang zia ah hi.**

U.S. te'n Pathian a suang dan uh hi a thupi khawp mai hi; gam vaihawmtu ding ah têltin thak President ziang le Bible chung ah khut nga hial ah kitiamna nei sek gam ahiu a, a dangka/sum ua **"Pathian ka suang u'i"** ti thugual (sentence) a chuansak hial u'i. Kingakna ding diktak in a kinga ua, suan ding diktak a suang zia ah un Pathian in a enliam pua, a ngaisak a, a dawmsang ziang a hi.

Tulai gam buaina lak ah Kochuamte malâkna ding lampi chuam chuam um ngei ina; "zia hi, zia kha bawl hitiu" tileu hinle Pathian ah i kingak masak phawtlo uh chun dinmun pha kichang diak pua'na. Gâl do di hi'n, midang panpi ding hitaleh, pauchap di hi ziang le hinle "PATHIAN KA SUANG U'I" tithei masak a pawimaw hi.

Gam Buaina Context: "A suang tapo in Lalpa chu suang ta'u hen" (2 Korinth 10:17) Gam buai kipat limlai kha nungthîl thak le'u hin, i la kisuampi'u kha i nam sepaite'u hilo a h'em? A nam - a nam in group chuam chuam tampi i nei ua, a khutlai/galvan nei teu kha i la kisuampi'u ahi deu vei maw? (Gen daw a hilo vâng a, dik di'n ka gingcha'i). Gâl um masang a khan le zia pawlte leh a khutlai matteu hi i kisuanna'u No. 1 a la bang sek him a hi.

I hung kido ua, i hung kikap tua ua, thina/manna i tuak ua, beidawnna'n ei chûm a,

hun chawmkhat zaw nung bep a khan, Kochuam te'n Pathian suang ding dan i hung hedawk ua, Pathian i hung buan sau sau tau hi. I nam sepai/tangval te'n le Pathian suang nachang a hung hia'u a, **"Hallelujah"** sam kawm ah gâl a hung do takzet phat ua khan, chunglam ah kipat panpina i dawng ziang uh hilo maw? A lopi khawp mai! Khawvel thilte sang in **"Pathian chu i kisêlna'u leh i hatna'u"** tihi i tângsapna'u (slogan) hithei leh a dawm-um khawp mai hi. Thingnuai leh thingnuailo le Pathian Kochuamte ngen i hui a, Pathian hatna suang him him phawt leu hin, a bân chu Pathian hung kisala mai ina.

Philanthropic Organization

Context: Nam chuam chuam umkhawmte hin organization i nei chiat ua, gam buaina chungchang ah i panlaknate'u hi lungdam a um khawp mai hi. Gam buai hun leh hunlo inle philanthropic organization i neite'u hin khawtâng leh vengsung phatna ding ngaitua in theitawp a sua zing uh a hi.

Kochuam leh philanthropic organization te pangkhawm in, kithuhiattua in liangvâi leh haksate panpi thei dân dân ah panpi in, a sawmdawl ua, a kantha sek uh a hi. Bawl ding dâwl him leh ki thalawp um tak nasep a hi. *"Zia ka unaute lak ah a neupen chung ah la hui kha le, keima chung ah hi' la hui"* (Matthai 25:40) kiti kha lungthim in a kilang hi.

Philanthropic organization te hile Kochuam khutsuak ngen i hui a, Pathian hi kingakna leh kisanpi pen (No. 1 priority) in kawi leu hin a dawm ma ma hi. Etsakna bailam pen ding in: Thusua/Thuzik hung kibawl sek te ah kipat in vak gen le hin; *"VPC/YVA/Zillai min in chibai kahun buk hi"* ti sang in *"I Lalpa'u Jesu Khrista min in chibai kahun buk hi"* tile hin hawi zaw hilo maw? A tawpna lam inle *"VPC/YVA/Zillai damsawt hen"* ti ziang sang in *"Lalpa'n VPC/YVA/Zillai umpi zing taken"* ti'n thuzik mai inle Pathian min suang thei leu hin hawi ma ma ding a hi. Kochuam huang sung bep hilo

HINNA VÂK

in; khawtâng, vengsung leh politics natiang inle Pathian min suang leu hin, bang zia in maw i khanto lo ding uh?

Kochuam Nasepna (Rawng-bawlina) Context:

Kochuam sung ah panmun nei dingte chu Kochuam Committee in kumsin in a guatlawk sek a, guat ah umte hin phû kisakna i nei chun rawngbawlina i hechian tak tak nai puai tina a hi. Phûlo leh tinglo deu ah i kihiat chun, mani hatna leh theina zia ah sem ding ah kikawina a hikit hi. Eima hatna leh theina mai ah bang chan? bang tiang? sem thei ding in i kigingcha him him em? **“Hepina nasep”** ahi ti i hiat a, huphur ma ma ziang lengle Pathian hatna suang zawk ding a hi. Zia chun a tawp tiang sem mualsua thei mai ding i hui. *“Nang un lei têl puau in, keima’n ka têl zâwk la hui...vaga ding leh la gau um zing ding in ka guat la hi zaw’u hi...”* (Johan 15:16)

Pathian ei lam ah a pan chun kua’n ei do thei ding a

h’em? (Romte 8:31) Gamsung buaina thu hitaleh, thagau lam ah melma dona ziang inle zia thu hi i vak hiat a, i simdaw phatleh a lungmuan um ma ma a, a kichawldam huai huai ziang sek hi. Sap pau leh ei pau (Vaiphei) ah Lâ inle a kisiam ta. A thu a hawi a, a ngaithâk le a nuam ma ma hi. Ahinla, Pathian ei lam ah a pan theina ding in bang a pawimaw em? tihi ngaitua sau deu ding in a dawium hi. Ngaisak/naksak a le i neilo, i kilepsan sek, i suan tak tak ngam nailo ahi chun ei lam ah bangti pangthei di?

Gam a h’em, nam a h’em, organization hitaleh, mimal hi ziang lehle, Pathian suangte chu a lawsam ngai puau. David in Pathian a suang a, a suan Pathian chun suangchang pakhat mai mai mang in Goliath, a huphur ma ma’u kha a khuplam in tual a baw sak ziang a hi.

Gâl zawna leh dinmun hawi zaw leh phazaw i dawi uh chun **PATHIAN SUANG HITIU.**

“KHANGLAITE LEH MIDANGTE PANPI” (Hebraite 13: 16)

~ Rev. Lalpiaklian
i/c D. Khawzim Pastor Bial

*Ahi'n thilpha hi leh kipanpitua ding hemil puai tiu, zia chu
Pathian pom tak kithawina chu ahi.*

Khristian Khanglai Pawl thupi **“Thilpha hi dingah Hukdam”**
Eph.2:10 hezing pum a midangte â ding ah panpitu chuleh,
midangte â ding ah malzawlina ti hi a vel ah geldaw thak kit hi
hen la. Thilpha mihing in a bawl ahi chun, ama a ding bep a
hilo dan leh mihiam chanpite a ding leh siamtu Pathian lung
sukawina leh kipakna ahi ti hi ngun tak a ngaitua ding a kûl a
hi. Zia gual thil bawl mite chu Pathian thu awite a hi ngal ua.

Pathian thil dawî leh tup
mihiamte ah sukatna ding
a semdawktu leh mualsuatu
ding in khanglaite Pathian in ei
dawi a. Thilpha hi leh panpina
midangte chung ah sulangtu
hi ding in Pathian in ei dawî hi,
zia chu i kithawinau Lalpa dan
ah pomtak i hi theina ding ua
i chung ua kinga chu a hi. Zia
na sukbutin theina lampi leh
theina nei chu khanglaite i hui
a hi.

Midangte Panpi ti thu hin
Philanthropic organization ei
unle i nei uh YVA lungthim in a
hung lang masa pen maithei.
YVA Moto *“Liangvaite
Gualpha”* supiting sekte
chu kuate a h'em i ti ahi leh
Khristian Khanglai Pawl te tho
i hui hi. Ziagual ah pan i lak zing
lai ua chun, midangte panpi
na hi lampi pani taksa leh
thagau lam ah khanglaite'n i
mawpuaknau vak en leu hin.

HINNA VÂK

1. Taksa lam ah: Mihiamte hi mimal ah khawsa thei kuama i um pua, kipanpi tua ding leh na kiseppiak tua ding ah siam i hiu. Nisin i khawsak nateu ahin Pathian in kipanpitu ding ah ei la guatlawksa ahi dan hechiantu te i hiu hi. Evi chu Adam panpi leh kithuapi ding ah a siam a hi (Gen.2:18). Mi hausa, bawlthei kisa, mi damthei takte hawn a phatlai un midangte mamawna neilo gual in kingai maleu, midangte mamaw hun hi a hungtung tei tei sek a hi. Tu laitak ah gal zia ah i khawvel dinmun uhi i vak et ahi chun i kimamaw nau hi gentamlo in a kilang huntawk a hi.

I haksatna leh beidawn ni ah ei kantha leh panpitu chu hiatmil thei ding gual ahi ngai pua. Mi lungthim gelthei diak te vang chun kenle banggual in ka panpi thei kit diam, ti hi lungthim ah hung um chu a hi. A hin panpi ngaite panpina ahin i mamaw hun leh nikhua ah Lalpa'n kua hem midang panpitu ding ei pe tei tei sek a hi.

Pathian thu sukbutinna ding a chun bang gual in nang midangte la panpi kha ta em? Khanglai midangte panpitu hi in i kihe na em? Dawtna pawimaw tak chu hi ngei ina. Mi tamtak te hi chu, “neilo zia ah kipanpi theilo” ti hi i suanlam uh ahi sek hi. Ahi'n, zia gual mite'n le i bawlthei uh um ngei ina. Lalpa'n talent zat chuam chuam ei kaw! sak a, midang in a neilo ken ka kaw! a um hi ti hi hiatmillo din a phai. La talent chu bang ahi em leh? A sep ah sephaw, ngaithak thaw, ginumna sukat, mi dangte pauchap piak, a dang tampi um ngei ina.

Tulai in i khanglai lak ua hin lungthim lam ah haksatna nei um ngei hi tiu. Zi leh pawsal kihawl na kong ahte, tu dinmun ah gal leh sa i neina zia ua te, zilna lam zia ahte, midang phaklo zia ahte, khawsakna niam zia a te. Zia gual mi i khanglai chanpитеu chu kiholimpi ah a haksat nateu gendawsak ah kihong tak ah ngaithak.

Zia chu ginum tak ah im piak di (Confidencial). A haksat nateu ahin panpi theina um ngei ina. Mi bangzat la panpi ta em leh?

Khanglai Lamka lamte â ding bîk in i khanglai chanpiu mi bangzat hem a hung galzam ua, i umna veng leh khuau hung bêl in, lungthim natak kawm ah khanglai ah kimang nuam ma ma nalaite kisuangla tak ah um bei din ginchak a um puai. A hung tângnel na ding un lampi siampiak a pawimaw a hi. Zia chu midangte i panpi thei nau pawimaw tak kit chu a hi.

Tinglo leh basam, kisit ma ma le hinle Lalpa min ah thil pha bawl i hieu chun Lalpan mal a zawl sek hi. *“Sam 124: 8 Ei panpi’na chu Lalpa, lei leh van siampa min in a um hi, ti tau hen”*

2. Thagau lam ah panpi: I hiatlo kal un Thagau lam ah kiak niamna nasatak gal zia in i nei ui ti a kilang hi. Thagau lam thil ah panpina hi tulai tak ah taksa lam tiang

ah ei vengbit tu a hi. Thagau lam ah midangte panpina a hin khanglaite hin bang gual in panpina i chiapiu emle tiin vak kidong ta leu hin. I KKP member-te mani dinmun haksat zia ah soal bawl na lampi ah petlut um kha dia aw ti hi, I lungthim un dawtna pawimaw tak hi leh ut a um ma ma hi. Thagau lam ah i kivenbit theina ding un Thagau lam thil ah kipanpituana hi habawl leu hinla. A pumpi et in i Kochuam uhi ei ha sukkhak ma ma mai a, Presbytery khat chên hialte i hieu a hi. I khanglai member teu khawilam a tung gam diam uh ti hi i ngaitua ngai awm?

Taksa ah chênna leh buaina tuak talualo ah kingaite le i lungthim ua hin Pathian thu hi i gamlat ua thagau lam ah kiakniamna nasatak i nei ui ti hi i dinmun uh hina. Chuleh, thagaulam ah i’n ba ma ma ta hi leu hin i kilawm ui. Bangti kivenbit ah a puk tate panpi ding ahi diam ti hi khanglaite ngaituana lungthim in um

HINNA VÂK

henla, i dinmun uhi siampha
ngal leu hin ut a um ma ma hi.

Zia siamphat na ding a
chun, pauchapnate hapan
thak kita, a tak ah kuandaw
ah sep ngalnate hi a paw
maw ma ma tai. I kuandaw
ding uh ahi leh vang gamlalo
cha ahi tai, eima insung leh
kochuam leh khawtâng ahin
mamawna a sang ta hi in a
kihethi hi. I membrete panpi
na ngai ngawi ngawi um ina.
KKP kikhawp ah kikhawm,
activities i bawl pangai bawl
ah lungawi mai ding chi hita
puana, tu ah i dinmun ua hin
sepding, Na thak mawpuakna
Pathian in ei piat tiin pawm
leu hin. Pathian in i sep ding
mission na naicha ei piak hi
sem dawh ah kipandawh din
ma laleu hi ut a um ma ma hi.

Khristian dan zuitu Khanglai
pawlte i hui a, Khrista dan i
zuinau chu subuting ding in tu
hun hi hun hawi leh lemchang
pen ahi ta mai diam? Puakgik
kidawntua ah thilpha hi ding
in Lalpan ei daw i a hi. Zia
chu Khrista dan i zuinau le
ahi him a hi. (*Galatia 6:2 La
puakgikteu chu kidawn tua
chiat un ; tichun, Khrista dan
chu la zui uh hi'na.*)

Hiti hin dawtna pawimaw
tak khat a um tai. Ka khanglai
chanpi te a di'n panpitu kahita
eh! Panpina in ma kalata eh!
A leh ngaituana seng nailo
khat kahi diam? Aw khanglai
la khanglai hun chawmcha hi
Lalpa a din a tam theipen sem
din tuni hi thupukna Pathian
min in siam ziang in, a vaigel
ma ne i in.

Mipilte'n tawt a bawl hun un kuama **sunalo** in mi
a **nuisak** sek un, **mingawl** tawbawl na'n vang mi
dangte a **liam** sek hi.

“THILPHA HI DING AH SIAM” (Ephesa 2:10)

~ *Upa Lunchung*
Singngat

Thilpha hi ding ah Khrista Jesu ah chun siam ah um in, a ma khutsuak i hingal un; zia thilpha hi chu i khawsak dan ding ua Pathian in a siam khawlsa ahi.

Khawvel a kinaw ta ma ma mai ah, hunte a liam zung zung a hi. Tunì hin i hetkhaklo gen gua i hipua, i hetsa himaleh Pathian thu ah kichapno thakna ah mat ahi ding dawina in chawmcha in ka hun zik ah, simtute Lalpa’n ahun malsawm ding hi ka pauchapna a hi.

I Bible chang zikna ah chun, Thilpha hi ding hih Pathian in i khawsak dan ding ua a siam khawlsa ahia, maleh, mihingte gitlo ah a puk tâk zia k un, siamtu Pathian ziangle a kisik mamai ti Thilsiamthu ah khan i mu a hi. Chapona dim mihingte i hia, Duâmna ah dim mihingte i hi. Ziagual mi i hi zinglai unle, i Bible chun, “*Diabol chu panmun pe kiu in*” (Eph. 4:27)

a titawp mai ahi kha. Thilpha hi ding ah i kisinsak phat phat leh buaina chuam chuam in ei hung nawk vel sek a, zia chu ahi zing kawm in malsawmna i dawnte haw kha i hemil kha sek ahi kha. 2 Samuel 24 na kha i sim ahi chun, Pathian a pat malzawl na David in a chante chu ki lopisakna leh kiletsakna ah la in Israel mipi te ‘*Kisimna*’ a hun bawl zia k in gawtna huaise tak mai 3

HINNA VÂK

(Pathum) têt ding in Pathian in a Jawlnei Gad a sawl ahi kha. Lal David chu hung khanglo in thilpha tak mai a hungbawl a hi. 2 Sam. 24:17 na kha i et ahi chun, *“Keima bep kahi a gilo chu; zia belamte hin bang a bawl ua ahem? La khut chu keima leh Ka Pa inkuante chung ah tunsak zaw ding in ka ni lahi”* a ti kha. Tuni hin midangte sang ah malsawm dawng zaw ah, khawvel lam ah kiletsak tak leh chapo tak ah um kha i hi chun, kivelthak in Lal David gual ah thupha chawi in thilpha hi ding ah siam ah i umnau supiting zaw ding in i kisinga zaw ding a hi. Araunah chun Lal David in kithoina a siam ding ah khan bangkim a thawn in apia, maleh, David in *“Keima kisennalo in bangtin em ka Pathian kiang ah halmang thillat/kithoina thil chu ka bawl thei ding”* ati gual in Thilpha bawl ding ah siam ah um i hina kihe in, a umsa chauh ah pat bawl gualo ah eima leh eima kisen a pawimaw hun ah le kiseng ah

chimchaklo hial ah a na i sep ding uh a hi.

Ephesate 5:16 ah chun, *“Nite a phat taklo ziak in hun la nei sung un a tam thei pen sem zel un”* ati a hi. Khawvel taksa gam ah chun i khawsak dan kibang vek puan ah. Khenkhat te’n nek leh dawn, sil leh chen kiningtak ah a nei lai un, khenkhat te a ding in zing leh nitak An ziang le sikhawp ma ma ah lungngai ngawi ngawi le a um bawkuh a hi. Ziagual dinmun ah i ding zinglai ua hin, hunpha i nei sung ah thil a tam theipen sem ding in i kisinga ding a hi. Buaina mênlo, lungngaina tawp khawku i tuak hun inle eima hatna mai suanglo ah Lalpa Pathian kiang ah i tut zel ding ahi zawi. Amalekte’n Negeb leh Ziglak a hal zaw nung nithum ni chun David leh a sepaite tawh a tung ua, a zi teu a chateu zosia sal ah puimang ah um ta ahidan a het un tha leh zung nei talo khop in, ha ka’n a kap ziang tau hi. A sepia honte chu, a zi leh a chateu ziak ah a lungthim

uh a nat mama ziak in, David chu suang ah se lup a gaw hial ziang uh ei kha. David a din hun haksa leh beidawn um tawp khawk hi din ngaitua thei in ah. Maleh, *“David chu Lalpa a Pathian ah chun a ma leh a ma a hung ki suhat tai.”* (1 Samuel 30:6) ti in i mu thei hi. Ziagual ah chun haksatna mun ah i din hun phat leh Lal David gual in eima leh eima i Lalpa Pathian ah kisuhat zel le hin Lalpa’n ei dawidan ah thilpha bawl ah mite a ding ah malzawl na hi thei ding i hi. I chenna gam a se ta, hun a kinaw ta a hi. Ziaziakchun Sawlchak Paul in Ephesa mite kiang ah a gengual in, enle tuhun ahin hun i nei sung un kithada lo in a tam theipen i sem diu a hi. Lalpa a ding ah semtu ginumte chun, bang

lam hem khat bek in Lalpa’n a sep gim gau a malzawl zel sek ahikha. Matthai 6:25 na in *“Ziaziak chun ka hun hil la hiu, bang ka ne’n bang ka dawn ta diam tin la hinnau thu leh, bang ka sil in bang ka cheng ta diam tin la taksa thu un lungkham kiu in, Nek ding sang in hinna a thupi zaw hilo ahem? Sil leh cheng ding sang in la taksa’u a thupi zaw hilo a hem?”* tia Lalpa Jesu’n a gengual in thilpha bawl ding in i hunte, i nei leh lamte bangkim huap in ch  n a ngai na mun ah ch  n in i Lalpa na sem lehin, siam ah i umna san tak sem kha pan ding i hi ngal ah.

Hethiam thei ding in simtute zosia Lalpa’n hun malsawm ta hen.

Mi **pautamte’n thug  k** a gendawk sek ua, mi **pautawmte’n** gendaw ding ah hawite nasan a **  mmang** sek ui.

“CHURCH LEH PARA-CHURCH KIGUIZAWPNA”

~ Rev. Ph. Thianneilal,
i/c Delhi Presbyterian Kochuam

Thumapui: Church (*Kochuam*) hung kipatna “*Birthday of the Church*” chu Pentecost Ni, kum zabi khatna, AD kha a hi ti hi mithiamte pawm dan tângpi a hia, nungzui ding ala kokhawmtu Nazareth Jesu thuhilte (teachings) suangphum ah kipat kiphu dawk a hi. Nungzuite chu Antioch khua’n “Christians” a hung kiti pan ua (Nas. 11:26), Jesu’n a thuhilte (chanchin pha) chu khawvel pumpi thezak ding in thupiak a nei hi. Hun chawmkhat zaw in Roman Empire leh a kiang kîmvel in Kochuam chu a hung kithêzak pan a, khawpi chuam chuam - Jerusalem, Antioch leh Edessa ah ten a hung kiphu dawk tai. Tichun, Rom Lenggam a chun Leng Constantine-I leh Theodosius-I lal lai kum zabi 4-na a khan Christian leh Kochuam chu Dan in a phal (legalized) shakhua a hung hi tai.

A langkhat lam ah Para-church (*kochuam-pangbel organization, society, forum*) kiti hi kum zabi 19-na 1840 vel ah hung kiphudawk (India ah 1977 vel) a hi. Kochuam chu tui kiting namsia, luangdawk lo ah gel a; mun dang ah chanchinpha hil ding a pawimaw hi, Jesu thupiak le a hi tite’n Missionary lungthim

nasa tak in a hun nei ua, Kochuam pangbel in, kochuam chu lungthim leh sum ah ki support sak in Missionary society a hung din ui. Support tamzaw a muna ding un kochuam bîk umlo (inter-denominational) leh Kochuam bîk ah saitau (denominational boards) din in Evangelism na a hun sem ua, amau chu

Independent organization a kitu a, himaleh, kochuam kikaihua (ecclesiastical structures) zul zui ve tho in pawl chuam a hun din ua, khenkhat chu NGO hung kiti ta le a um ui. A Independent taluau a, a pawl hi le a hung tam ma ma ziang a, tuni tiang a hin Para-church (kochuam pangbel, kochuam sponsore) pawlte hi hiat sen le a hi tapuai. A hung kipat dante et chun Chanchinpha puanzak a hung kipat piu a hi sek zia in Kochuam inle a siatna hiat a haksa sek a, tichun, sum leh pai leh lungthim (financial and moral support) a hun pia ta zel sek a, kochuam sang a nasem zaw hial ah ngai le mi tam tak a hung um tai. Para-church hun phudawkte laka challangte chu Henry Venn leh Rufus Anderson te a hui. A til ah para-church society a hun phudawkte chu - the Church Missionary Society (CMS) in England leh American Board of Commissioners for Foreign Missions (AFCFM) a hi. A til in a hawi ma ma a bang in ginglote'n le gingtu hina'n a mang un a lopi khawp mai

hi. Hinla Kochuam lungthim leh kochuam lopina sang ah mimal ngaidan leh mimal thuneina kitaklatna a hung tam deu deu a, gingtute lak in le zia lungthim chu a tu nasa ma ma ua, kochuam financial support ah nasem a hi zia kun sponsorship gel thupina a lian ma ma a, khutdaw dan kizilthiamna khat le a hung kisuak ziang ta a hi. Tulai inle kochuam pangbel - kochuam min ah kibawl leh kochuam khat bep in ei support ding ti lunggel nei in inter-denominational society siam in sum dawn (collection or donation) bawl dan thiam tak tak a pung to zel ta Kochuam ten hiatthiam ah kivenbit ngai hial in a kilang ta a hi. A phudawktute leh a thuhil teu et chun Church (Kochuam) leh Para-Church (Kochuam pangbel) te chu kibang lo tak a hi. Ei lamte hin Kochuam leh Para-church le kihia khen theilo, sum muna ding leh chanchinpha lam tawh kisai a hi chun genuine Kochuam dan in i ngai mai ua, zia zuilo, zawmlo te chu gindan diklo ah ngai le a um hi.

HINNA VÂK

Etymology of Church and Para-Church:

Kochuam hung kipatna thubul (etymology) chu: Thuthung Lui ah '*qahal*' ti a hia, a umzia chu mipi pungkhawm, sepai duty dinga 'kiko dawk te' tina (Gen 49:6; Kisimna 22:4; Ezek 16:40). Grik pau in '*ekklesia*' ti a hia, a umzia chu khua leh tui hina neite; gam kivaihawmna lam tawh kisai (political purpose) ah 'ko daw te' tina a hi. Thuthung Thak a hin '*ekklesia*' ti chu Jesu ging pawlte (a group of believers) genna ah kimang a hi. Thuthung Thak a hin '*ekklesia*' (kochuam) ti paumal hi 112 vei mu a hia, 90% chu Paul lekthawtte, Nasepte leh Thupuan ah kimu a hi. Chanchinpha Bu li te a hin kochuam ti paumal hi 2-vei mu a hi (Mat. 18:16,18).

Para-Church hung kipatna thubul chu Grik pau 'para' kipat a hia, a umzia chu sappau ah 'next to', 'side by side,' 'along side of, by, near" tite a hi. Ei pau ah i gen chun 'Kochuam tawh kibang thim a ban tak, kochuam tawh chiakhawm, kochuam pangbel,

kochuam zal ah kal suang (moved/support by church), kochuam tawh kinaicha um organization, society, committee, forum, fellowship tina hi pen in a. Para-church hi chini in a kikhen a - Missionary organizations leh Charity Organizations a hiu. Zia chun a huap thei chu ziagual society ten mission field gual ah a nei sawn uh Orphanage Home leh Rehabilitation centre tite, Pathian thu based ah nei nasepna chi chuam chuamte a huap vek hi. Ei lam in i hiat dan a chun Inter-denominational forum, society, tite hi a chuam dan in i gel sek ua, Pathian thu tawh kizui ah nasepna, pawl etc. Kochuam direct ah a kigawllona zosia hi a huap vek a hi.

India sung ah Missionary Organizations umte chu: (1) Indian Missionary Society (IMS), (2) Friends Missionary Prayer Band (FMPB), (3) Vishwa Vani (4) Gospel Echoing Mission Society (GEMS), (5) Indian Evangelical Mission (IEM), (6) Youth With A Mission (YWAM), (7) Blessing Youth Mission (BYM), (8)

Campus Crusade for Christ (9) Ravi Zacharias International Ministries (RZIM), (10) Serve India Mission (SIM). Charity Organizations te chu: (1) World Vision India, (2) Evangelical Fellowship of India Commission on Relief (EFICOR), (3) Compassion Ministries, (4) Church Auxiliary Social Organization. Zia cheng hi registered organizations a hia, a ki registered lo Kochuam in sum ah a support ngaicha khutdaw zing kawm ah um society, forum, fellowship leh inter-denominational society, committee tite tam tak a um ua, amau chun para-church kiti ding le a nuam puau a, maleh Kochuam pangbel, kochuam zul zui ah chia, kochuam lung hawl a hi tho tho ui.

Para-church organizations te kigawlna leh a nasep te:

1. Billy Graham Association pattern zui ah Evangelical crusade associations siam.
2. Evangelistic and discipleship ministries siam.
3. Music and print publishers, radio and television stations, film studios,

online ministries, Prayer Fellowship, Ecumenical/ inter-denominational pawl phudaw.

4. Study centers and institutes - schools, colleges and universities siam.
5. Political and social activist groups siam.
6. Welfare and social services siam. Etsakna homeless shelters, child care, domestic violence, disaster relief programs, and food pantries and clothing closets, and emergency aid centers such as City Missions.
7. Self-help groups, Bible study groups & House churches siam tite a hi.

Para-Church ten Kochuam chung ah a lungput dan uh:

1. Kochuam chu a zèng/a thi, mission a ding ah daltu (hindrance) a hi. Society ah thilpha neucha a hi teu chu a gen uang ma ma sek ui.
2. Kochuam hin amau bep hi Pathian matchak a hui tileu a nuam ua, ministry dang

HINNA VÂK

Kochuam in a bawlte chu a pawm thei puau.

amau chia dan chu pha a sa mai ui.

3. Kochuam in a sum chu mission nasepna leh mipite a ding ah mang lo in building sakna leh gam chawknan a mang nasa ma ma hi a ti sek ui.

Lam chuam chuam ah Para-church in Lal nasepna a suknawkhak dan:

1. Sum leh pai ah ginumlo (lack of accountability), kochuam a support ut puau, Lemchan a thiam ua, kithua khawm dan a tasam ua, Mimal a ha focus ua, thulai lak dan tite a tasam ui.
2. Party spirit a nei ua, unity a tasam ua, building a ngaisang ua, Pastor/Upa te leh mipi khendan a guau a, midang ngaidan lak (flexibility) a tasam ua, mimal ngaisan bik a nei ua, diktatna tasam in, business bawl a lunglut ua, damdawi leh thil dang ah sumkawlvei a lunglut ui. Sum dik tak ah mat, Cash Book maintain leh audit bawl tite ngai a sa puau a, dik leh dik lo leh

Church leh Para-church:

A dik tak a chun Church (Kochuam) hi Jesu'n a phudaw a hia, thuneina zosia leh mawpuakna zosia (chanchinpha puanzak, dik tak ah vaihawm, meithai sawmdawl, nauchaga etkawl, panpi ngai dang - damlo, genthei panpi tite) a chung ah a kawi a hi. Thutan/Vaihawm thu ah te, chanchinpha puanzak thu ah te nungzuite (Kochuamte) kiang ah thuneina chabi a piak a hi. Para-church kiti haw hi Bible ah a kigenna mun khat ziang cha le umlo a hi. A pawimawlo a hi diam! pawimaw taleh Jesu khan le Para-church bangzat ahem a la phudawk intin, a hiloleh, a nungzuite bek phudaw sak ding a hi. Tichun, thilpha i hiatteu chu Church (kochuam) malatna ah bawl zel ding a hi. Mizoram Synod chun a hethiam a, Grace Home, Orphanage Home, Missionary tite Kochuam in a bawl zel ui.

Himaleh, tulai kochuam memberte laka para-church ah tui ma ma, kochuam lak ah

lunglutlo tite a um zel a, ziate haw hin kochuam hina leh a lopi zia a hiatchianlo uh a hia, zilti a ngai un, a hiatchian uh a pawimaw ma ma hi. Kochuam ah thagau chênglo, dangchâk, keugâwp gual ah gel kochuam pawlam ah thagau nawitui kiningting zaw gual ah ngai ah kochuam pawtsan, kochuam nawk a, thil dang lunglutpite hi a daisawt thei diak puau a, a hinkhuau leh a inkuan uh a chavai nuam ma ma hi. Khenkhat chu thagau in a lungthim uh hi vak piak in 'chapa taimang' gual ah Kochuam ah hung kilekit le tam tak a um ui. Chuti hilo ah 'makhai man ah mang ta' munphia ah phiat daw thaw ding hial ah thagau lam ah tuina mawng mawng nei thei talo le a um hi. Belam man ah mang 'ki ko ko, ham ham ziang' Upate, Pastorte'n ei dawn nuam puau tia kithasiat lâkte, kochuam activities ah lunglut le hi diaklo a um sek bawk hi. Ziagual mite chun kisanlana, zakchana tite a nei sek ui.

Tulai mi khenkhat in sum siamna ding in para-church a phudawk sek ua, nasepna

chi chuam chuamte hi Khrista taksa bâk siamna a hi ti'n Bible ah thilpha kigente bawl in Grace Home, Rehabilitation Centre, bang bang forum/ society a phudaw ua, Thagau thilpiak chi chuam chuam chang dan in a kigel ua, ziagual chu chang a hui chun Sawlchak Paul gual ah Tent Making Missionary, Kuama panpi, Financial Support ngaichalo ah thagau mangthai hawl in kipia leu chu kuama a pakchalo ding um puan a. Maleh, sponsore, foreign aid leh kochuamte kiang ah panpina ngak in khutdaw in a um sek ui. Kochuamte'n tu Para-Church kitite nasep haw hi i sep hun uh a hi tai. A hi ding him le a hi. Para-church ten a sep ziaak un a mawng lam hi hawi zo talo, Kochuam tawh kituaklo, kochuam le hilo pawl a hun phudawk sek ua, Kochuam ginumna a sudau un, dan ni tak leh hung khawk zaw sem in, Kochuam dem/dodaltu hung pung nalai ding a hi.

**Tulai gingtu naran Pathian
Thu hechian zet lote buaina:**

Pathian thu hechian lote chun "bang organization

HINNA VÂK

pen ahin ka um ta diam?" ti hi dawtna um thei tak a hi. Organization pha tak tak, bible zui, chia hawi ma ma gual ah kilang Para-church tam tak a um ta; hung um be zel ding a hi. Zia thudawt dawnhuna chu *kochuam bel inla, kochuam member dik tak (hileh kilawm ti mai mai in) a sukling zo lo, suangphum chung ah In kisa gual in ding det in*. Kochuam member diktak hinla, la nawp leh Para-church chu pha la sak leh kithuapi (support) zaw'n. Tualsung Kochuam ah Para-church lam ngai pawimaw pen (priority) ah nei member khenkhat a um sek ua, zia chun, ngaidan kibanglo a hing dawk sek a, Kochuam pumpi chu pawl - pawl ah kikhenna a um khawlaw sek hi. Ziagual thil phalo chu a hung um phat leh ki-elna a hung um sek a, kituaklona leh kikhenna hial a tung thei hi. Ziagual lungthim chu haisan in kipumkhat tak in Pathian Lenggam tundawk gua'n semkhawm zaw hitiu.

Thutawpna:

Buaina hung umdaw sekna ziaak lian pen chu i hiatdan diklo

ziaku a hi sek hi. Ki-elna te, khat leh khat kipawm theilonate, lunggel kibatlonate hin buaina a siam dawk sek hi. Para-church te hi ngaisaklo hial thei le a hi pua; Para-church ten le Kochuam a ngaisaklo thei a hi diak pua. Bangkim hi Jesu zal ah um a hia, Jesu phudaw ngei Kochuam hi zabawl zaw chiat in, Kochuam dawidan tak, dik tak leh fel tak in Para-church ah chun na sep di a hi. Kochuam panglo in Para-church a um thei puan, Para-Church bei in Kochuam vang a um thei bep hilo in a navak in kivaihawmna a hawi nuam zawi. Bang pen chu hi taleh, thil hung tung (events or issues) te hi pilna, hiatthiamna leh Pathian lenggam tundaw theina ding lungput nei ah kimaituapi ding a hi. A sukfelna (solution) ding chu Kochuam or Kochuam pangbel ah umte mimal khut ah um a hi. I thiltup pipen diu chu thagau mangthaite kiang tung pha ding ah chanchinpha hil hiding a hi. Chuti leh hina kihechian in chintawk hia'n semkhawm thei hitiu.

“AHI’N LA, THOIMUALTE CHU LAKDAW AHI PUA’I”

(1 Lengte 22:43)

~ T. Upa Sawilianmang Vaiphei
Delhi Presbyterian Kochuam

A pa Asa lampi zosia a haw ah; zia chu pêtsan lo in, Lalpa mit mu ah thilpha a bawl hi; ahi’n la, thoimualte chu lakdaw ahi pua, mipite chun thoimualte ah chun gimtui lân in a kithawi zing nalai ui. (1 Lengte 22:43)

Solomon chu thoimual ah gimtui hâl in, kithawi sek maleh, Lalpa a hepi ah, a pa David thuse’te chu a zui hi. (1 Lengte 3:3)

Thiampu Jehoiada in a hilna zal in Jehoash chun a dam sung sia’n Lalpa mit mu ah thilpha chu a bawl hi. Himaleh, thoimualte chu phiatnâm a hipua’n; mipite chun thoimualte ah chun kithoina leh thillatte a bawl zing nalai ui. (2 Lengte 12:2-3)

Lalpa Pathian thupiakte lak ah pawimaw pen pen pakhat chu, Ama tilo pathian dang himhim biaklo ding ti a hi. Thusawm Piak lak ah thupiak masapen a hi kha (*Pawtdawna* 20:3). Israel chate kha le Kanaan gam a lut masang ua pat thoinamualte

haw khetchim dia a hillawk sa a hi (*Kisimna* 33:52). Ama Thiangtho Pathian tilo, pathian dang mawng mawng biak-leh-ho hin A thikthusiatna a chawktho sek a hi kha. Israelte khangthu leh chanchin i sim ah i suileh avel-avel in a dikna muthei a

HINNA VÂK

hi. Ama mitelte ngei, A hepi mamate chung nasan ah siatna huaisia A tuaksakte, A gawtna zosia haw i etsui ahi chun a ziak chu a Siamtu Pathian kiheimangsan ah, pathian dang, milim pathian hawpo a biak ziak uh a hi sek hi. A daidawp sek puai.

Ahi'nla mihiamte hin Pathian thupiak zui hi haksa i sa mama sek u'i. Nidanglai titaklo in tuni tiang hin a hi zing nalai hi. Israel leh Judah leng leh lalte haw, vaihawmtu leh mipi puitute haw khale a petkhial ngen tawbang ahiu kha, a tamzaw. Leng khenkhatte chu Jehova Pathian le biak di, milim pathian haw ang ah le kun di ti chîng a hîu. Thagau lam ah zum-leh-zal tua in, Israel Pathian diktak kiang ah kithawina huntawk salo in, namdangte pathian dang dangte ho in, thagau lama angkawmin a kisubuak sek u'i. Da-um tak mai in.

1 Lengte 22:43 ah kigen Judai gam Lengpa Jehoshaphat

khale i etsui leh a sepdî dawl sem bukimlo mi khat a hi. A pa Asa kha Vaihawmtu pha, Pathian mitmu ah midik ahia, Jehoshaphat khanle a pa Asa lampi zosia a haw ah; zia chu pêt-san lo in, Lalpa mit mu ah thilpha a bawl hi; ahi'n la, thoimualte chu a ladawk puai. Pathian thu leh khawvel thu helpawl in Pathian a sulungkim puai.

1 Lengte 3:3 ah Solomon umchan kigen khale vak sim leu hin 'thoimual ah gimtui hâl in, kithawi sek maleh, Lalpa a hepi ah, a pa David thuse'te chu a zui hi.' Thoimual ah gimtui le hal, Lalpa le hepi tho. Pathian tempul thupi tak mai le kum 20 hial lut ah sum tamtak seng ah sa. Kilungpi saktak mai ah a zite haw pathian a di le sa zel siam zel. Kawp gelgel. Pathian lungnatna a chungah hung tung ah. Hilele a pa David ziak ah ama damlai ah a lenggam kekzaklo a hi kha.

2 Lengte 12:2-3 ah Leng

Jehoash khale zum-leh-zal tu a vaihawmtu ahi kha. Lalpa mitmu ah thilpha chu a bawl hi. Himaleh, thoimualte chu phiatnâm hilo zel.

Ziahaw gual ma chun, Leng Joash, Leng Amazia, Leng Azaria leh a dangdang le thagaulam angkawmna ziaak in mipi tamtak a puk khawlaw ua, Pathian a petmangsan khawlawu a hi.

Tulai gingtu tamtakte hile amau haw gual hi khak hi a dawi-um maw na e! 'Kei vang amau haw gual hi ka hi puai timai thei i hui.' Ahinla ki enchian thak leu hin pha'na. Siamkawm milim ma-anga va kun ah va kithawi seselo ah le thagau ah angkawm thei hi talua a hi.

1. Du-amna: I Baibul in du-amna hi milimhona a hi a tia. Sum-leh-pai hawlina ah hakat takluat thei a hi. Pathian bia manlo zen, Pathian thu ngaisak manlo zen, Bible sim manlo zen,

pauchap manlo zen, Zi leh cha enkawl manlo zen, sum mu theina dia thu vak heikawi deu ahem, lawkna dia zuau 'neuchacha' gen, lawkna dia thu-imguk, milian-milal maipha hawlina ah chawm khatkhat Khristian hilam kihemil, adangdang.

2. Lawtinna: Khawvel ah Lawtinna hile Pathian in A chate le ei dawisak mama hi. Ahin Ama Pathian hephalo zena sepna sang, gualchungchuanna (sports, thiam zilna, academics), government contracts, etc nam pumpi a di hiziang lele, zia lawtinna i tup kha, i ngaisanpen, i lunglutpen, i dawipen, i pathian hung hithei a hi. Jehova Pathian suk lungnat thei a hi.

3. Science & Technology: Khawvel thiamna a sang ta. Khawvel ah masawwna tamtak a um tai. Thil thakthak, hawi taktak,

HINNA VÂK

etlawm taktak, maksakum hial ziang thei machines, computer science, artificial intelligence, medical science, nanotechnology, etc. Mihiam kipilsakna hin Pathian mun awtlo a hi. Science hi pathian dinmun hung lua gua a hi ta hi. Ngawl taka um di tina hilo ah. Ziate haw zosia, mihiam zosia chung ah um Kumtuang Pathian hi hiatmilo di a hi. Zia thiamnate haw mama hi mangcha ah a lopina , a nasepna ah matchak zawk di a hi.

4. High Places: ‘Thoimualte’ ti ah Vaiphei Baibul (BSI edition) in i leu hi English Bible version khenkhat in ‘High Places’ / ‘Munsangte’ ti in a let u’i. Nang a dia la high place/munsang bang ahi dia aw? A sun, a zan ah la ngaitua thupipen bang a hi em? Khawvel ah la ngaichatpen bang a hi

em? La duthusam sangpen bang a hi em? Khawvel ah la dawipen bang a hi em? Khawvel ah la kipaknapen bang ahi em? Zia penpen chu la mimal pathian a hi. Zia la lungdamnapen chu la mimal ‘thoimual’ a hi. Khawvel thil bep hilo thagau thil, kochuam thil ziang hi le i thoimual hi thei a hi. I kochuam hi Pathian sanga le ngaikhawk zawkthei a hi.

I kochuam ngai sang talua, midang kochuam demdem ziang? La thoimual ahi chu. I kochuam nasep leh Pathian nasep kibang la ti leh chu, kochuam la thoimual ahi tuak chu. Pathian nasepna buai talua, Pathian tawh kipawl manlo. La nasep chu la thoimual ahi chu.

5. Kisui belap nalai leh , a dang dang le tam in ah, nang mimal thoimual bang ahi em kienchian chiat hitiu!

“AW KA PATHIAN, AW CHUNGNUNG PEN”

~ Upa P.Boijoy Vaiphei
Compound Veng, Lamka

*Aw Ka Pathian! Aw chungnung pen!
La hepina’n ka ma ei puizing in;
Tinglo leh taklo vang ka hi e Lalpa!
La hepina’n ka ma ei puizing in!
(La hepi bantha in ei tha lo zen in!)*

- 1. Aw namtin te hin, thimnuai zalen khutbeng in,
Thatnawp um in mitin lung a kuai;
La chanchinpha tawh kitawn talo;
Sual huithi’n ka leng vel ui
Pheiphung suan dan ka thiam zo sek puai.*
- 2. Hansia law tuallei ah tuchan hin aw Lalpa
Ka Pathian, a lamdang ngei e lei hepina!
Ka kipak hi Lalpa; Aw ka kipak ngei;
La chanchinpha’n gamtin fangsua hen!*
- 3. Gam leh gua a keu gam ta, la thuthun te a guitung zo tai,
Maleh sual huithi nuai hin ka hun pha neisunte haw;
Ka hun liamsa’h ka sual nate leh tu ah le,
Lalpa ei ngaidam in aw!
Lungtup ka mualsua thei na’n*
- 4. Singsung pi leh pu, Chun leh zua ngailai te’n
La chanchinpha tawh kitawn in banzal kawi leu;
Thu thang te dang puan tin, gal thu te thang puan tin
Lungtup mualsua na hizaw’n ah!*

HINNA VÂK

Insung chatga zia ah lawi leh paite thilneite phazolo ah, gual eng ah a la ki um zing a hiziak in lungthim natna ngen in a la ki dim ah, ahinla, Nu leh Pa'n "La hung let phat leh Officer liantak hung hi ding lahi" ti ah ei la thathawna teu zal in lauthawng kawmkawm ah thawnawpna liantak tawh tupgukna khat nei in hinkhua a la kimang to ah. Abang hileh, lawtinna ding in Pathian lo ngal bel ding leh ei puihuai ding dang a um puai ti ngaituana tawh lungtup mualsua na ding in ti in, Pathian kiang in a guk in ka pauchap sek ah, zia hun hi Class VII/VIII ka sim lai a pat a hitai. Bible ah Sam pakna Labu kizik dante lungthim ah kawi zing kawm in, kenle, **'Ka Pauchapna La'** ti in a thu tamlo cha zik in mimal Pauchapna La ka la nei pan hi.

A bultil lai achun a thunawn leh chang khat ding bep hi a la hi. Ahinla, hunte hung liam zel in, hinkhua matdante le hung ki thengto zel in, tanglak khat hung hita a ki hina dawl in, umchan leh tawidante le a la kisang ah, khawvel fan dan le a la zau zaw deu ta,

Khawvel ah mite umchan leh tawidante haw zia in ngaituana chuamchuamte nei in lungthim natna'n ei la chum ah, *"Bang atia khawvel mite hih hiti ki siat thei lawmlawm ziang ahitam? Thing leh guate lah nisin ah kiphuk kiam tultul ta mai. Huithiang tuithiang te khawi ah hung kipan ding a hitau em? I gam ah Pathian ei thilthawnpiak mantam tak te hi bang atia ki entup talo ah keu san sesu ah ki umsak ziang a hitam? Thing phung khat a hung hina ding ah chun thingkek no khat chun kum bangzat a h'em a hung la to ah, a phuk thak na'n simkhamlo hun chawmcha a lut ah. Bang zia ah i tanggam teu hing dum zinzen talo mai a hitam? Maban banggual hung hi ding a hitam? tite hin ei la khawi nasa mama ah. Pathian thilsiam lamdangtakte hi i mu tak leh a siamtu chu paktak him ahi ti geldawk ah siamtu Pathian pak zawk tak sang ah mani kiphath ah nung leh ma khuallo ah, kiang kimvel ah kua'n ei la mu gu ahem ti le hetalo ah, numei pawsal thanhuaina ah chinchai bei*

ah hinkhua i mat ziang tak uhih! Khawvel nawpchenna ding ah nek guk chak guk ah insuan ah pa te cheng ki tai el ta mai, Kochuam gam ah le kigensiat leh kidemtuaana ngawn in vaihawm ta mai hih tite haw'n ka lungthim a la su na mama ziang sek ah. Khangthak naupang kei uh a ding ah ettawn tâk kuama a um taklo mai hih; Pathian a kipak zing zo na dia aw ti hin ei la khoi ten a hi.

Khawvel zau zaw ka thil zing lai a chun, mani insung ki etchian masak poimaw ka la sa kit ah, Zillai naupang khat hina dawl ah neu apat lungtup ah kinei, lekha thiam khat hung hi ah, Officer lian khat hung hi ding lungtup ah ka la nei zing lai ah chun ka insung background in la ei thek zo lo in, maban kalsuan ding dan ka la buai ten mai ah. Ahinla Hepitu Pathian zal ah Class X leh XII te lawtinna sangtak ka la nei ah, zia chun ei thathaw mama ziang ah, ahinla, maban sawm zel na ding in insung mi hi henla, pawlam mi hitaleu, kuama panpitu pha ding ka la kimuzaw pua, Class X ka pass

hun ah ka kipakna a la bukim lo, Class XII ka pass zaw ah aban sunzawm ding ah Delhi ah chanaute bel ah chia ka la guat ah a lemtheilo ziaak ah ka lungthim nat mama nate kha, ka mihiam hina hin tuni chan ahin ka milthei taktak naipuai. *Insung mite bang atia kigensiat leh kidemtua na ah kidim tamai ahem? Bang ati leh thing kek no chu tui buak piak ah, a kiang kimvel vatthian piak ah, a daikai piak zawk tak sang ah limsaklo ah ki koi ziang ahi tam ti hin ei la su lunggim mama sek ah, khatvei vang chu lungthim nat leh lunggimnate ziaak ah lungna talua in, ka chalpang hi puanvawm in ka gak ah, gamnuai mite lak ah pang ding in taimang ka la gua, Ukhatampak ka tun in ka pa'n ei khâm tâng ah, sual lampi ka la haw theng man tavang a hi.*

Pathian in nam khat ah ei siam na dawl in i mi nam ngainatna chu kei ma a hinle a guk in a la lian mama ah, Tanglak lungthim a chun, pil le ka la kisa, suan le ka la kisuang tho sek ah, taksa gam tak a chun mel leh puam ah

HINNA VÂK

mi phala lawmlawm in le ka la kigel pua, Music lam ah Pathian zal ah ka talent nei dan le ka la kihiat ve ah, kitangval sak hinkhua nuam deu ah mat po le ka la gua sek ah, ka la chia sual vangvang mai sek ah, ahinla, ka insung chatga nate zia in lungthim neuna in ei la khaktup zel sek ah, ka hiatlo kal ah Lalpa'n kei a ding ah dai ei kai piak na khat a hidan ka muchian mama in, ki awimaw na leh ki thamuanna ka la nei kawpkawp a hi.

Ka kingaituana a chun, Pathian hansia law khawvel ah mihiam khat ah ka hung pian hin bang umzia a nei em ka la kitia, Taksa gam ah panpitu pha hi ding chu ka la nuam mama ah, tu leh tu hin hiziang nailo maleng, Pathian in lem ei ti piak ahi chun, hun khat leh banghem khat lam bek ah mi lak ah sim thei hung ki hi ngei na'n ah ti lungthim ah ngaitua na tawh, tuchanchan ah zia gual ah insung genthei tak a pat Pathian in ei puihuai ah ei langkai dante ka ngaitua chang in hepi tak ah ei sawmdawltu ka Pathian ah chun ka kipak

mama ziang sek ah, A tepi ding gual umlo ei hepina chun ei puihuai zing ah zia tiang hi ka insung mite tawh kimchang tak ah tung ka hui ti chu ka la muchian mama ah, ka la kipak mama ziang ah, ei puihuaitu Pathian chu lopina sangpen piak zing ah, zia khawvel gamthim kidak um tak a hih Pathian chanchinpha'n a hung salvak ah, insung mite kituak theilo ah kigensiat tua na, khawsung mite ki melma etna te leh khawvel gam ah thimnuai siatna zozaita hi a hung bei theina ding in pauchap zel ingka ti in ka pauchapna la saulo cha kha ka la belap tai.

Zia a guk ah ka pauchap sekna la hih a bul til ah changkhat leh a thunawn bep a la hi ziang maleh, a biktak in Class X leh XII ka sim zaw hun ah ka result a hung kipuan zaw til lai vel ah ka lunggil tak ah ka Pathian kiang ah ka kipakthu genna leh ei panpi to zel ka ut mama zia ah ka la pauchapna chu hiti gual ahin ka la zik suak tai. Pathian lopina chang ta hen!

KKP HUANG

Pauchap khawmna a lah neithe

Pathian hepina jal in KKP Kangvai Pastor Bial te’n tukum 2024 a ding ah a niveina Bial KKP Pauchap khawmna Torbung Kochuam Biak-In mun in June 29, 2024 ni’n a lah mangthei u’i. Maban ahinle, branch Pali(4) ah Pauchap khawmna program nei nalai ding ahi’u.



Tangphai Synod Choir (2024-2026) kalsuanna

July 13, 2024 ni’n Tangphai Synod Choir(2024-2026) te chu Zillai Meritorious Awards 2024 hawpdawna hun in Pathian pakna Lapawl sak kalsuanna masapen a lah neithe ui.





Sunna

REV. NEKTINPAU (KANGA)
(August 15, 1960 - February 26, 2024)



Famchangta Rev. Nektinpau @ Kanga hi (L) Pu Kaigin leh (L) Pi Kaikhoting chate pakua (9) lak ah a pali (4) na a hi. August 15, 1960 kum in Gangpimual khua'n ala piang hi. Pianpi suapi pawsal 3 leh Numei 5 a nei hi. 1985 kum in (L) Tualkhothawn leh Pi Nempum te chanu Mrs. Lianman tawh a la kicheng un, chapa 2 leh chanu 2, tupi 1 leh tunu 1 a nei hi. 1996 in Manggol Mangbi College, Ningthoukhong ah BA (Hrs.) History a la zou hi.

Lalgam nasepna lam:

2002 kum in Grace Bible College (GBC) Churachandpur ah M.Div. a la zo in, Date 13/12/2003 Kumtawp Khawmpi in New Lamka Kochuam Biak-In ah Rev. PK Lianmang khut in Pastor Namdetna a la chang hi.

Pathian Lalgam na theitawp ah a sepna-

- | | | |
|---------------------------------|---|--|
| 1. January 2002 - May 2004 | : | Pastor i/c Leijangphai
Pastor Bial |
| 2. June 2004 - March 2005 | : | Special Training
Course, @ ATC |
| 3. April 2005 - December 2007 | : | Pastor i/c Leijangphai
Pastor Bial |
| 4. January 2008 - December 2008 | : | Pastor i/c S. Kawtlian
Pastor Bial |
| 5. January 2009 - December 2009 | : | Practical Training @
Saitual, Mizoram |

August 2024

6. January 2010 - December 2012 : Pastor i/c D. Khawzim
Pastor Bial
7. January 2013 - December 2017 : Pastor i/c B. Phainuam
Pastor Bial
8. January 2018 - December 2019 : Office
9. January 2020 - December 2020 : Pastor i/c Lamka
Pastor Bial
10. January 2021 - December 2021 : Minister at large,
Lamka Pastor Bial
11. January 2022 - December 2022 : Minister at large, New
Lamka Pastor Bial

***12. December 11, 2022 Synod Kikhawmpi in Pastor Pension a
la pe tai.***

A hun nunung lam:

2022 kum ah pat in hisello na zat chuam chuam nei in, Kidney Problem leh Diabetes ziaak in a hung hatlo deu deu ah, 2022 October tha ah pat in dialysis patient in a hung kienkaw! in, hapta khat ah ni vei, thum vei dialysis kibawl zel in thisan taksap bek ziaak in, Unit 10 kipia in, insung miten pauchapna tawh theitawp sua ah etkawl himaleh damzo talo in Date 26/2/2024 Seppatni nitaklam dak khat leh a kim (1:30 p.m) in a na a seppiak Lalpa kiang ah chawldam ding in ei la nusia tai.

*Report petu
Upa Mangkhokhai
Secretary
Gangpimual Kochuam*